

Wai Study Help

Melanie Riwai-Couch - Kaiwhakahaere

Ko te akoranga ko Wai Study Help, ko te kaupapa hei tautoko ki ngā tamariki mō te reo Pākehā. He mea mō te hāpori hoki ka haere mai ngā kaiāwhina, ka noho rātou i te taha o ngā tamariki, ā, ka āwhina ka tautoko me ēra atu momo mahi.

Ko ētahi kaupapa e puta i te whakaako i te reo Pākehā i konei ko te pānui, te tuhituhi, te kōrero, te whakarongo hoki i te reo Pākehā. Ka puawai ai te reo o ngā tamariki nei nā te mea nā te kaha o te reo Māori i te tuatahi.

Ko te mea tino pai ki ahau nei te angitū o ngā tauira i tēnei tau i rere atu ki Ahitereiria, ka whakaatu ki ngā tangata o taua whenua. I tēra tau i whakaatu rātou ki ngā hui e rua e pā ana ki te angitū o rātou akonga i te reo Pākehā. Kei te mōhio ngā tamariki he mea tino pai te mau ki te reo Pākehā ki te taha o te reo Māori, he pai ngā reo e rua.

I te tīmatanga o tēnei kaupapa ka kōrero tahi a mātou ko te iwi ko Ngai Tahu e pā ana ki tēnei akoranga. Ko te mea tino pai rawa atu mō tēna ko te whakawhitiwhiti whakaaro, ka mōhio ngā wawata mō te rohe nei, ā, ka pēhea te haere pai hoki. E ai ki te whānau o te kura nei ko te pirangi mō ngā ākonga ki te tū kaha ki te tū pai ki te reo Pākehā me te reo Māori hoki.

Corey Kamariera - Matua

Ki ōku whakaaro he rautaki e āwhina ai ngā tauira o tō mātou nei kura ki te pānui pukapuka me te āta whakahua i te tika o te kupu me pēhea te whakahua i te kupu me te pānui i te kupu. Mōku ake ko te whāinga matua he whakapakari i ngā tauira o te kura nei ki te pānui pukapuka. Heoi anō, ko tētahi o ngā tino hua kua arohanui rātou ki te pānui pukapuka nā te mōhio, nā te mātauranga ka whai aroha rātou ki te kaupapa, engari, ko te whāinga matua pea o te kaupapa me ako te tamaiti ki te pānui pukapuka.

Aaria - Ākonga

Ko ngā mea pai e pā ana ki te Wai Study Help, ko ngā kaiako ka haere mai ki te tautoko mō te pānui me te tuhi kōrero.

Te Matau - Ākonga

He kaupapa tino pai tēnei māku nā te mea, ko te reo ki konei, puta noa i te ao ko te reo Pākehā, nō reira me ako mātou i te reo Pākehā kia whai ōranga i roto i tēnei ao.

Wai Study Help

Te Aho - Ākongā

Ko tētahi mea pai ko te pānui nā te mea, e kai ngākau ana ahau ki te pānui. I ako au i ētahi meka nō ngā tangata whenua o Ahitereiria, arā, ngā tangata moemoea me kī.

Te Matau - Ākongā

I te wā i haere mātou i runga i te wakarererangi i te whakaharatau mātou i o mātou kupu kia kore e ngaro mātou i te wā o tēra o ngā kauhau ki ngā tangata Ahitereiria. Āe, i pai tō mātou haerenga. Ki ōku nei whakāro i ea ngā mahi nō reira i tutuki. E noho ana mātou ki tō mātou pāpā, ko tō mātou Māmā e noho ana ki Tāmaki-Makaurau. Ko tō mātou pāpā e tino hiki ana mātou ki roto i o mātou mahi i te reo Māori me te reo Pākehā. Ko tāna kia nui ō mātou mātauranga i roto i te reo Māori me te reo Pākehā. Āe, koia rā te take i purua a ia i roto, i tautoko a ia i te hōtaka nei te Wai Study Help. Āe, nō reira mihi, kau atu au ki tōku pāpā nā tōna āwhina i a māua ko tō mātou whānau. He āhua pēra ki nga mātua, āe pēra te tata kia mātou ngā ākongā he āhua ōrite ki ngā māmā, pāpā. Āe nō reira pai tō rātou mahi.

Corey Kamariera - Matua

Ko te mate i ētahi wā kāore rātou i whai wā ki te ako i ngā mea iti o te reo Pākehā kia tū kaha rātou ki ngā ao e rua. Nō reira ko te painga o te kura, ka ako i te reo Māori me ōna tīkanga. Engari, ki te mōhio rātou me pēhea te kōrero i te reo Pākehā kia tika te reo Pākehā, kātahi ka tū rangatira rātou i roto i ngā ao e rua.

Kua tutuki kē te nuinga o ōku moemoea. Kia whai aroha rātou ki te pānui pukapuka. Ināianei ko āku tamariki kei te mau pukapuka i te ao i te pō. Ko taku tama i te pō, ka pānui pukapuka tae noa ki te wā ka moe ia. Te nuinga o te wā mā mātou e mea atu “tēna tineia tō rama, me moe, me moe” engari, kei reira tonu ia ki te hēkona whakamutunga, kātahi ka moe ia. Kua aroha rātou ki te pānui ināianei.

He nui ngā kōrero a Te Aho Matua. Kāre Te Aho Matua i te titiro ki te ao Māori engari, kei te titiro ki te katoa o te tangata, ōna taha katoa. Mō te ao hurihuri nei, he pai kia whai mātauranga i ēnei tamariki e puta ana i te kura kaupapa, ki ngā ao e rua. Nō reira ko ngā pānga o tēnei rautaki e kore rātou e matakū ki te kōrero Pākehā me te pānui i ngā mea Pākehā. Kua kite atu au i ngā mea ki roto i ngā kura auraki tē taea te pānui, te tuhituhi me te hē hoki o te reo Pākehā ahakoa i tipu ake i roto i ngā kura auraki. Nō reira maringa nui ā mātou nei tamariki. Kua tīmata tēra tipu mai tēra tau, a, tae noa ki te rangatahitanga.

Ko te mea nui pea ko te whānau, kāre i tua atu i te whānau. I te mea ki te puta atu te tamaiti i te kura kāre i te tautoko, kāre i tautokona e te whānau he uua kia kite atu i ngā hua. Ko mātou nei i te kāinga ka noho tahi me te tamaiti ka pānui me ngā kupu whakamana i te tamaiti, ēra momo āhuatanga katoa. Me whai whakaaro ngā kura ki

Wai Study Help

ēnei momo rautaki. Kei te kitea ngā Māori, ngā tauira Māori e puta ana i ngā kura kāre e mōhio nei ki te pānui. Kāre hoki e nui ngā rautaki pēnei i roto i ngā kura i tēnei wā, ā ko ngā whānau te mea nui mei kore ake te whānau e kore pea te ākongā e tū kaha, tū rangatira nei. Koia pea te huruhuru o te manu kia rere ai te manu, arā, mā te tautoko o te whānau me ngā kupu whakamana i te tamaiti, whakapai mā tēna ka rere te manu. He mea nui te whānau kia haere mai.

I mua i tēnei rautaki he uaua mā māua ko tōku whaiāipo te whakaako i a mātou tamariki ki te pānui pukapuka. Ko tētahi o ngā raru kua pau katoa te hau i muri i te mahi, hoki atu ki te kāinga he uaua i ētahi wā te whai aroha ki ngā mahi kāinga. Wā māua nei rautaki kāre i tino whai hua ko te nuinga o te wā he kōhete me pānui tonu, kāre i a mātou ēra pū manawa ki te whakaako i tēnei mea te pānui pukapuka. Engari, i kite māua i ngā hua i roto i ngā wiki e toru pea i rongo i ngā kōrero mō ngā kaiāwhina, anō he atua rātou ki āku tamariki. “Ko whaea mea i pānui nei ki ahau”, kua āwhina mai i ahau kātahi ka kite i ngā hua, arā, ko ā māua nei tamariki e kawē pukapuka ana i o rātou hikoitanga. Ka pātai atu “he aha tō pukapuka?” Ā, ka whakamārama mai ngā kōrero o te pukapuka, nā tēna ka whai aroha māua ko taku hoa ki tēnei rautaki. Ināianei, e kore, kāre i ārikarika ngā mihi ki a rātou mō tēna āhuatanga, e kore rawa te puna mihi e mimiti. I te mea kore rawa e taea e māua i taua wā, inā ko māua tēra kua pōturi tonu te haere. Ināianei kei te rere ki ngā rangi tūhāhā ā māua nei tamariki kei te tihi o te keokeo, kei te tihi o te maunga rātou e noho ana. He waimarie, he mihi tonu ki te rautaki, ki a koutou hoki ki te hopu i ēnei kōrero me whakanui i tēnei rautaki ki ngā kura katoa.